

四庫全書

集部

醉扶銀燭畫堂深
妖嬈喜識春風面
零落愁關夜雨心
多幸鳳皇池上客
為抽勞思寫清吟

顧德輝

字仲瑛一名阿瑛崑山人輕財結客年三十始折
節讀書築別業於菑涇西曰玉山佳處其亭館三
十六備極瀟灑記必名宿詩必勝流即篆隸二三
字亦必選當代名筆風流豪賞著稱東南後來罕
有能繼者

金粟冢中秋日燕集

綽山古佳城左股接昆丘
水作青龍來九派盤遭週道

人金粟冢在彼山之幽團團青桂樹枝葉相卷膠石削
華表立碑刻金窠鏤人身無百年胡乃三彭仇四大偶
一失金丹不能瘳肉血潰臭腐不朽唯髑髏棄之道路
傍行者得溺洩狐狸與蠅蚋食噉紛相讐欲貽後之人
以掩面目羞烏兔互出沒急行不入郵縱有萬丈繩誰
能繫之留暖穴競螻螳涼風滅蜉蝣榮名乃何物汲汲
將奚求金谷珊瑚樹天網一夕收美人化黃壤燕子巢
空樓大印佩六國散金馳八騶一朝不得志車裂徇九

州秦皇與漢武靈藥採仙洲玉棺葬地底金鳬出海取
梨花自寒食夜雨鬼啾啾飛錢化蝴蝶走燐驚鵲鷓混
沌鑿不死倏忽何能休丈夫不解事老大傷白頭何如
種秫米壓酒日日篋今夕三五夕我已為君謀長鉗置
十斛百結青絲兜截江取紫螭攀樹摘紅榴周垣設茵
席矮几陳脯脩步登白雲屏待月豁醉眸劃然白蝦蟇
抱出黃金毬又若摩尼珠躍出驪龍湫吐吞大地影晃
漾東南浮老兔玉杵臼搗作人間秋寶城三千里縮景

歸遐按宮殿魚鱗騫林木秋雲稠素娥騎彩鸞舞雪翻
霓裘手折瓊樹花競拂金精流化為五素芒落我白瑤
甌持滿向君語借箸請為籌十載苦國難豪傑紛戈矛
鴻門碎玉斗桃園宰烏牛戰血濺野草餓莩填荒溝我
時挈妻孥夜汎苔雪舟有兒握兵符承乏萬戶侯三年
效忠歸身作抱官囚平生萬卷書怒焚遭鬱攸廬墓讀
內典守節事清修親友散如雪雲樹空悠悠獨爾數君
子艱棘見何由今聞王師出卒伍皆兜鍪弄刀走官馬

千里風颭颭桓桓李將軍大旗画蚩尤去秋奪汴城今
復追大酋屯兵泗水上添竈扼賊喉東南貢米粟連綱
起歌謳我曹幸無恙坐見恢皇猷酒旗指南斗今茲會
綢繆請起各稱壽我亦相勸酬羣才盡敏捷用作釣詩
鉤青山忽大笑此意君知否呼童酌大白酹此土一坏
他時蓋棺了神隨和氣遊申插空中華撒手鞭蒼蚪東
海招若士西池訪阿緱共看麻姑爪當座劈瑩篋不必
兒女淚暗灑窀穸愁達哉司空圖吾今乃其儔大書勒

崖壁永絕生前遊

次周履道韻

夜泊石湖湖水傍芙蓉露白蒹葭蒼
畫船酒行飛急觴美人羅袖隨風揚
長檠翠幙高高張浩歌起坐秋夜涼
明月已在天中央大星小星光煜煌
酒酣不記過船去但聽秋聲響疎雨
夢中化作蝴蝶飛飛入花間向春語
鄰雞喔喔東方曙船尾浪花風起舞
為君起和夢中詩水氣如煙度秋渚

天寶宮詞寓感

四首

蓮花池畔暑風涼，玉竹迴文寶簟光。
貪倚画屏調翡翠，誤開金鎖放鴛鴦。
輕綃披霧誇新浴，墮髻敲雲銜晚妝。
笑指女牛私語處，長生殿下月中央。

號國來朝不動塵，障泥一色繡麒麟。
朱衣小隊高呵道，粉筆新圖徧寫真。
寶雀玉蟬簪翠髻，銀鵝金鳳踏文茵。
一從羯鼓催春後，不信司花別有神。

五王馬上打毬歸，贏得宮花獻貴妃。
樂起閣門邊奏少

禍因臺寺諫書稀侍兒隨幸皆頒紫骰子蒙恩亦賜緋
姊妹相從習歌舞何人能製柘黃衣

宮衣窄窄小黃門躑躅初開賜縹盆夜月不窺鸚鵡冢
春風每憶鳳凰園愛收花露消心渴怕解金荷見爪痕
只有椒房老宮監白頭一一話開元

夜宿三塔

水落南湖不露沙又牽舫子到僧家春浮大斗娟娟酒
寒隔虛櫺薄薄紗半夜檐鈴傳梵語一林江月照梅花

坐來詩句生枯吻
指點銀鉶索煮茶

自贊

儒衣僧帽道人鞋
到處青山骨可埋
還憶少年豪俠興
五陵裘馬洛陽街

夜坐金粟池上得涼字

翠沼新秋浴夜光
畫闌芳樹發天香
西風陣陣廉纖雨
荷葉荷花不奈涼

往鳳陽次虎丘

柳條折盡尚東風
杼軸人家戶戶空
祇有虎丘山色好
不堪又在客愁中

黃公望

字子久自號大癡常熟人徙富春天姿孤高少有大志試吏弗遂乃隱西湖笥簑泉歸富春年八十六而終子久博通今古詩微晚唐而画直接武關全馬

和鐵厓竹枝詞

水僊祠前湖水深
岳王墳上有猿吟
湖船女子唱歌去
月落滄波無處尋

和竹所詩奉東顧仲瑛 二首

花檻香來風入座雕籠影轉月穿櫺
鉤軒平野連天碧排闥遙山隔水青

竹裏行厨常准備濁醪不用惱比鄰
文章尊俎朝朝醉花果園林處處春

王蒙

字叔明吳興人趙松雪之甥画山水師巨然得外
氏法為文章章不尚矩度操筆數千言可立成隱於
黃鶴山自號黃鶴山樵人亦以此稱之元末
官理問入明為泰安州知州坐黨禍而死

登泰山

有引

余過奉高謁嶽祠見郝伯常三詩刻於廡下明日登
日觀峰下瞰滄海塵世蒼茫青徐在衽席間耳因成
此詩以補郝公之所未道者云

飛仙挾我遊天門足躡萬壑雲雷奔凌虛直上數千尺
適見混沌分乾坤鉅鼇左折蓬萊股鯨波東注扶桑根
地高俯瞰滄海日天近仰叩清都閣古帝何年闢下土
九點青煙散寰宇翠旂孔蓋此登封盛德神功照今古

人間瞬息三萬年七十二君何茫然秦皇漢武踵遺蹟
鏤玉坎壈山之巔金宮翠陛苦不樂遣使碧海求神仙
羲和龍轡不稍貸豈料海水成桑田試向封中一回首
六合坱莽空雲煙千秋誰識當時事五松大夫知此意
巖前長揖大夫松數子胡廼干秦封高標直下魯連節
避世不及商山翁雪髯霜幹如屈鐵濤聲瑟瑟吟悲風
松本無心偶然耳人情好惡多彌縫欲傾箕顙一瓢水
為汝淨洗羞慚容為君解嘲君勿怒萬事轉首成虛空

帝子絳節朝丹宮神靈婀娜羣仙從噓呵紫燄開芙蓉
光景上屬超鴻濛玉女夜降騎青龍鸞鵲鳳笙聲噦噦
霓裳舞袖飄長虹瓊音間作鳴絲桐白露清謠曲未終
冷風命駕歸崆峒千峰萬峰浸明月恍惚身在瑤池宮
明朝稽首下山去翠幙突兀青霞中

客中感懷

十年踪跡厭紅塵功業無成白髮新夢裡不知身是客
覺來惟有影隨身夕陽衰草梁園暮細雨閒花楚水春

馬足經行今幾度溪山應笑未歸人

閒適

綠楊堪繫五湖舟袖拂東風上小樓晴樹遠浮青嶂出
春江曉帶白雲流古今我愛陶元亮鄉里人稱馬少游
不負平生一杯酒相逢花下醉時休

宮詞

南風吹斷採蓮歌夜雨新添太液波水殿雲廊三十六

不知何處月明多

仁和俞友仁見此詩歎賞曰此唐人得意句也遂以其妹妻之

過姑蘇

山圍平野綠煙中江葦蕭蕭兩岫風誰種闔閭門外柳

年年飛絮入吳宮

門一作域

潘純

字子素廬州人少有俊才遊京師一時文學貴介
爭延致之每宴集輒云潘君不在令人無歡至正
間御史大夫納琳開行臺於紹興其子昂阿給執
同知圖沁子素實為畫計乃未幾子素亦罹害焉

送杭州經歷李銓代歸

東家老人語且悲衰年却憶垂髫時王師百萬若過客

青蓋夜出民不知巷南巷北癡兒女把臂牽衣學人語
高樓急管酒旗風小院新聲杏花雨北來官長能相憐
民間蛺蝶飛青錢黃金白壁馱西馬明珠紫貝輸南船
繁華消歇如翻掌官中賦斂年年長里巷蕭條去不歸
華屋重門結蛛網語終嗚咽不欲聞道傍狼虎方紛紜
麒麟鳳皇那復得使我益重髯參軍參軍在官近一考
素髮蕭蕭坐成老上官掣肘下吏罵賴有閭閻獨稱好
杭州公事天下繁大才處決無留難參軍累官日益貴

何術可使斯民安

岳王墓

湖水春來自綠波
空林人迹少經過
夜寒石馬嘶風雨
日落山精笑薜蘿
江左長城真自壞
鄴中明月竟誰歌
惟餘滿地蒼弘血
芳草年年深碧多

錢塘懷古

海門寒日淡無輝
偃月堂深玉漏稀
萬竈貔貅江上老
兩宮環珮月中歸
內園羯鼓催花發
小院珠簾看雪飛

遺恨至今猶未了至尊行酒着青衣

館娃宮故址

苧蘿雲物媚修容玉燕金鸞送入宮吳下諫臣終受戮
越中國史不言功烏啼月落霜初曉鹿走春風草亦空
香徑屨廊隨世換倚巖惟有寺樓紅

送金谿道士南歸

南州高士芰荷衣賣藥都門盡不知手種谿頭千樹杏
花開正是到家時

和鐵厓竹枝詞

雲髻高梳鬢不分
埽除虛室事元君
新糊白紙屏風上
盡畫蓬萊五色雲

題宋高宗劉妃圖

秋風落盡故宮槐
江上芙蓉並蒂開
留得君王不歸去
鳳凰山下起樓臺

題趙子固画蘭

江上青山日欲晡
幽花小紙墨模糊
華清宮殿生秋草

零落滕王蛺蝶圖

陳基

字敬初臨海人少與其兄裴受業於黃潛遊京師
授經筵檢討因為人草諫章得罪引避歸里值南
州用兵起為樞密府都事轉江淞行省郎中以本
職參張士信軍事遷學士院學士明初召入預修
元史賜金而還

秋懷二首

梧桐墮金井寒螿栖露叢離居在萬里一夕生秋風秋
風忽已暮離居邈何處獨寐在重幃相從乃中路

秋水不可涉美人安得從眷彼芙蓉花盈盈秋水中非
無舟與楫所畏蛟與龍臨流不能采零落委芳叢

寄姚子章

聞君又作錢塘客多在青樓少泉石佳人姓蘇名小小
占斷西湖好春色沙棠為舟桂為槳驚起鴛鴦飛兩兩
有時醉倒百花間不記六橋新月上行樂須當少壯時
英雄自古皆堪悲歸來莫負張京兆鸚鵡窗間喚画眉

羣珠碎傷吳帥潘元紹衆妾作

潘七妾皆青年絕色善纂組歌詞因

潘出軍恐致
疑皆自經

繡紋刺綺春纖長蘭膏髻鬢瓊肌香芳年艷質媚花月
三三兩兩紅鴛鴦翠靴踏雲雲帖妥海棠露濕胭脂朶
冶情紛作蝶戀春新曲從翻玉連瑣畫堂銀燭天沈沈
揚睂一笑輕千金明珠買得綠珠心欲揮魚腸掃妖彗
主君勿疑心似醉一宵痛擊羣珠碎門前鐵騎嘶寒風
奇勲解使歸元戎

謝從義叅軍自京還言危中書見問且訝無書因

寄謝

參軍過我夷白菴為言廊廟高巖巖故人誰為國柱石
臨川先生危大參猥蒙問及且見訝十載尺書無一緘
憶昔相從客燕趙削去崖岸無猜嫌辱陪五更佐三老
勸講六經陳二南御史不容丞相忌司隸側目宮臣讒
脫身黨籍走吳楚託跡丘園求孔眊孰令展禽三見黜
自分嵇康七不堪平生不解帶刀劍晚歲強使嫺韜鈴
髀消怕騎將軍馬面顰羞着從事衫折衝師旅非夙習

奔走戎行真可慚危言重畏速官謗微祿不逮供親甘
慰情屢抱鞶絲女與國未辦添丁男胡為長年在道路
席不暇暖突不黔幾回乞身向藩省未許曝背歸茅檐
終當投劾謝寮友徑去結屋依山嵐鄙夫出處蓋如此
為報先生聊口占先生事業則異是論道經邦民具瞻
早令四海偃兵甲盡遣百姓趨農蠶時和歲豐我所願
功成身退公當諳他年若訪赤松子一笑相逢掀紫髯

新郭

扁舟夜泊新郭市石湖水深清且泚長笑一聲天地秋
萬壑驚風泣山鬼匡廬生玉山子意氣相傾誓終始呼
童沽酒烹錦鯉醉入蘆花月如水周郎放歌踏船尾我
亦和之聲亶亶明月照我心秋水洗我耳富貴亦何為
人生行樂爾城中黃塵眼為眯安得置我丘壑裏

送庸田司寶惟善經歷

籍甚中朝彥翩然萬里情禮從蓮幕重詩到水曹清未
雪辭吳會先春入薊城殷勤黃閣老能不問蒼生

闕鄉驛用故翰林宋顯夫韻

為問西來使長安去幾何檄書飛燹道征戍動交河
鵲承恩舊葡萄入貢多平生二鳥賦感慨未能磨

寄玉山人兼東匡廬外史

美人不見已三月日日相思賦角弓興發頗疑詩有助
憂來翻訝酒無功未須結客遊樊上却擬移家住灊東
與報匡廬于外史新醅宜壓荔枝紅

笠澤有懷

碧梧翠竹鬱參差
艾納流薰繡幕垂
瓊管隔花聞度曲
画屏燒燭看圍碁
坐延太乙青藜杖
倒著山公白接羅
何日綵舟還蕩漿
為判痛飲習家池

別後聞入杭賦寄

柳洲寺下絲竹繁
蘇小墓邊風日暄
天開十里水如鏡
雨過六橋花欲言
画船夜聽孤山鶴
鐵笛曉驚西竺猿
歸來相遲桃源上
為唱竹枝傾綠尊

偶成二首

武陵溪水碧灣灣窈窕幽期不可攀
戴勝桑間飛自得
王睢洲上語相關
歌成桃葉臨流和
采得蘋花帶月還
見說荔枝漿已熟
不分涓滴到人間

南州五月尚兼衣
白苧窗間未脫機
青李來禽書不至
荔枝盧橘賦多違
水晶簾箔圍晴晝
艾納鑪薰逗夕霏
為問上都城裏客
菖蒲花發幾時歸

賦楊花

巷南巷北晝冥冥
搖蕩春風未肯停
薄命不禁巫峽雨

前身曾化楚江萍已於謝女詩中見更向劉郎曲裏聽
腸斷不堪回首處並人飛過短長亭

次錢伯行韻

五月東林水竹涼新荷葉小柳絲長且臨大令鵝羣帖
不戀尚書雞舌香楚客謾誇千樹橘杜陵共愛百花莊
滿天風露枇杷熟歸奉慈親取次嘗

次韻答秦文仲郭義仲聯句見寄

客路尋常江海上春光強半雨聲中習池無酒醉山簡

蓮社有心期遠公香燼旋溫婆律火茶煙輕颺石楠風
不因二仲聯詩至安得從容一笑同

春日邵氏園池

寂寞園林帶夕暉昔年曾此戀芳菲柳塘水暖鴛鴦浴
花徑風酣蛺蝶飛蔓草拂衣人不剪画梁無主燕空歸
洛陽池館闕興廢我欲春山賦采薇

寄沈仲說

野人籬落並江濱竹裏流泉竹外雲好學橐駝惟種樹

莫誇司馬最能文
小橋斜接漁樵路
落日爭呼雁鷺羣
獨憶咏歸亭上客
久留城府思紛紛

淮陰雜興 二首

千里相逢淮海濱
一枝誰寄嶺梅春
老來易感山陽笛
年少休輕跨下人
失侶雁如秦逐客
畏寒花似楚遺民
每過百戰瘡痍地
立馬西風為損神

落木蕭蕭雁度河
西風嫋嫋水增波
甘羅營裏秋聲急
韓信城頭月色多
淮市有魚聊可食
楚山無桂不須歌

古今無限關心事付與當年春夢婆

二十九日至淮安城南十五里述懷

欲向江湖覓釣磯此心長與事相違
添丁未辦廬全計算老空知伯玉非
淮甸草肥宛地馬楚州人著漢宮衣
將軍奏罷平西捷還許山翁倒載歸

分省諸公邀遊西湖宴樂

湖上相逢宴屢開紫薇花下釣舟來
水光釀綠凝歌袖山色分青入酒杯
蛺蝶影隨羅扇動琵琶聲逐画船回

獨憐英骨埋芳草南拱枝頭蜀鳥哀

綠波亭

眼明忽見此亭新公子詩成思入神
坐愛澄波千頃綠夢回芳草一池春
每煩鸚鵡留佳客欲採芙蓉寄遠人
燕子不來秋已暮倚欄無語獨逡巡

秋日雜興

一夜西風木葉飛畫梁落月淡餘輝
銀燈夜照還家夢金剪秋裁寄遠衣
霜信早隨新雁去素書深訝故人稀

無因為謝東曹掾鱸熟蓴香莫便歸

八月十三夜泛姚江城

画船撸鼓唱回波皓齒青娥不用歌好月愛看輪未滿
清秋莫問夜何如明將織女機絲動寒恐嫦娥白髮多
天上清光應更足羽衣安得共婆娑

劉永之

字仲修臨江人幼從父宦遊四方即以嗜學聞長
益孳孳汲古與同郡楊伯謙彭聲之諸賢互相鍼
砭其文有唐宋大家之風宋景濂雅愛其人與文
見諸所贈詩中嗣子劉奉獲罪縣官竟藉其家以

富累身視唐陳子昂
得禍相同為可歎也

茅屋讀書圖

峨峨蒼山白雲冒之靈液澆瀉為清漪帶我林薄環
我蓬茨春日載陽卉木華滋呦呦鳴鹿泛泛浮鷺樂此
幽獨理我琴冊嗟彼聖賢遺我今則顧瞻周道零露在
草駕言從旃中心慄慄澗有蘭茝山有蕨薇逍遙卒歲
皓首為期

秋懷

白日行西陸氣候慘以淒沈沈夜未旦皎皎明月輝寒
蛩響陰砌羈鳥鳴高枝耿耿不能寐攬衣起徘徊天道
諒幽遠人理固多違念彼西方人喟然傷我懷翩翩梁
間燕矯矯雲中雁南翔復北逝時序倏已換駕言出西
郊登高縱遊觀原野何蕭條流潦方漫漫萋楚有餘悲
下泉興永歎安得攜美酒聊以娛今日幽幽澗裏蘭娟
娟常自好秋風厲嚴威零落隨百草芬菲豈不美衰榮
順天道嗟我平生友離居心惴惴坐令鬢成素為歡當

及早晝夜相代更誰能置懷抱涼飈振庭樹浮雲結重
陰中情忽不樂拂几彈鳴琴泠泠多苦調零淚沾衣衿
遠懷東都士登彼北邙岑悵然望京洛五噫發哀吟悠
悠千載下誰識古人心

門有車馬客

門有車馬客駕言發西京備諳興廢事具識治亂情天
子旣神武儲君復神明鐘鳴啟雙闕王侯方雁行要途
無貴戚密地有寒英懷柔建六典戡強用五兵西伐踰

蔥嶺東征際滄溟北盼訾沙漠南顧定儋瓊金圖啟天
秘銀甕發地靈八表既蕩一九有悉來庭鄙人值陽九
嗟與厄運并慷慨攜客歎矯首睇太平

翠屏山房為羅伯綱賦

結構依茂林開軒面青嶂浮嵐變朝采宿雨經池上春
陽正和煦生意日條暢徑草綠已繁皋蘭葉初放脩翰
摩煙霄游鱗泳清漲動息皆自然至理妙無象遺紛便
靜觀寂寞諧所尚偃仰丘壑間中情無得喪

題匡山石室

羣山爭盤紆衆壑盡奔放中峰最奇絕直立數千丈危
構倚石壁面勢極弘敞心神坐超忽雲雨接惆恍山色
晚更佳泉聲靜逾響猶言最絕頂臨眺極所往欲窮千
里目更試九節杖

楊弘中藥室

秉志慕冲澹息迹在丘園閒庭徧芳草高窗見遠山采
苓陟松逕煮朮散榆煙董生垂往躅嵇子有遺編神宇

謝氛濁天倪諒斯全
惟當振塵服與子共清言

野老看雲圖

文湍激幽澗白雲流
遠山偃仰長松下延眺一怡顏
清風拂素服瑤花落樹間
拾薪青煙際煮苓供晚餐
耽此丘中賞竟日未言還

秋林讀書圖為章光遠賦

疏雨稍侵竹輕颼已滿林
山窗敞虛寂席戶映深沈
沈蟪蛩或夥几蝸牛時觸琴
酌酒磐石上把卷高梧陰披覽

未終帙繁思浩盈衿義皇脩已遠叔季遘荒淫懷哉魯
連子輕世有遐心願保金玉體遺以瑤華音行當拂塵
服就子碧山岑

題煙雲臺

祠宮儼肅穆靈貺赫然敷藻井垂珠寶素壁繪金圖澗
長三花樹林栖九子烏遙峰隱殘照丹霞晚漸舒渺然
登雲駕誰謂古今殊

山亭宴坐懷西峰諸友

荒溪無來軌山亭迴且深清風左右至夏木靄繁陰飛
飛雙珍禽啗啗流好音懷君青霞珮歷亂朱絃琴惟應
西峰月可以喻同心

方壺画軒岐論道圖為道士何仲旭賦

彩筆發神祕僊山開画图靈文隱玉笈石扇啟金樞寤
寐軒岐術結交蘇董徒羽服繫蘿帶筇杖縣藥壺行當
謝塵服從子崑崙墟

雪峰詩為蜀人賦

岷峨鎮坤維上有太古雪寒光萬壑連皓采千峰列石
竇玉泉生琪樹瑤華結挂笏面嶙峋中懷共高結

山澗讀易軒

環環碧澗連靡靡蒼山屬初日照林端春餘鳴布穀松
深有去雲苔靜無來躅獨把一編書時向窗間讀

海屋為蕭君賦

結屋青海上弄影蒼江涯手持翡翠竿誤拂珊瑚枝龍
噓春霧合鶴度曉雲垂弱流幾清淺為書報安期

題枯林蘭

猗蘭生遠壑，蕤粲玉芳白。露溥夕景光，風轉朝陽吹。
簫望澧浦鼓，柅向沅湘何。以貽遠者，徘徊雙鳴璫。

同劉伯高分韻得羽字

僧居謝煩燠，蕭條對疎雨。碧甃躍金鱗，石梁散文羽。水
氣暗浮窗，林煙細縈樹。忽憶掉觥船，牽荷弄秋渚。

贈友人之章貢

秋雨正冥冥，秋風何淅淅。對酒送行人，憂思坐填積。黃

鵠不可馴飛蓬易相識幾日對崆峒滄洲渺難極

黃士一為余作墨梅效陰何體

朝陽耀白雪微月照寒泉玉環承佩結明珠綴組連不
愁歌吹闌已向畫圖傳詎是揚州郭偏蒙何遜憐

為潘仲輦題定使君所贈馬郎中畫鶴

郎中畫鶴稱第一江海十年多見之蘭皋明月照獨舞
雪影參差風倒吹滄洲玄圃三山上琪樹金芝日應長
萬里懷歸惜羽毛中宵怨別流孤響通泉素壁久漂零

忽見新圖百感并
華亭舊歎傷心切
赤壁扁舟入夢驚
綠錦池邊飼秋雨
驃騎多情每同賦
相思欲報故人知
為傳一札東飛去

田園幽隱圖

我家清江縣城北
竹梁花埭環深宅
鄰屋分燈夜讀書
仙山借鹿春耕石
蹤跡年來逐轉蓬
萬事驚心舊業空
無錢買山惟愛画
坐對新圖如夢中
柴門茂樹雅相向
野水山橋接空曠
雨足沙田野犢閒
風回茅屋荒雞唱

隔林炊黍起新煙接竹穿籬引澗泉
傍隄楊柳皆新種近舍松枝不記年

題傅商翁觀松瀑圖

山風蕭蕭晝寂歷長松落落倚絕壁
紫煙乍留青益中瀑布迸落蒼厓石
山中之人形骨清幅巾藜杖時獨行
溪迴陡絕去無路坐撫瑤琴摹澗聲
我亦平生慕真賞十年誤落江湖上
故山蕭條久不歸夜雨秋衾夢長往
人生適意無是非雲林久與幽人期
九節預裁青竹杖

明朝試拂薜蘿衣

送羅與敬歸西昌

石龍磯畔多芳草遊子憶家春已老
水北楊花撲地飛
旁人謾道飛花好愛子不忍別
送子到水濱
青天孤影飛黃鵠
落日長風吹斷雲
朝發銅塘津
暮宿青泥渡
帆過孝通祠
漸是西昌路
金魚洲遠樹青青
三顧浮煙生杳冥
石扶壞道通高閣
水齧危沙見古城
君家正在一方住
獨有園廬俯江渚
昨夜深閨夢遠人
相思定倚櫻

桃樹

行路難

涉水多蛟龍跋山多猛虎荒城荊棘上參天大澤脩蛇
橫草莽百里慘黯無人烟驅車暝行陷泥滓前車軸折
後車來行人不覺旁人哀眼前道路已如此何況太行
高崔嵬為君歌路難請君試一聽位高金多豈足貴擊
鐘鼎食未是榮東溝水流西溝涸昨日花開今日落世
事榮枯反覆手七尺之軀安所託古來賢達人與時同

卷舒龐公鹿門隱馬生鄉曲居款段聊乘下澤車何用
終朝出畏途

畦樂園

郭南抱甕者久與世情疎砌長龍鬚草林開燕尾渠轆
轤花下轉蒿苳雨中鋤蔗熟能相寄酬君薤葉書

王若水山水

谷口寒潮上厓陰宿霧開石橋通窈窕金棧寄崔嵬樹
暗茅堂閉波明桂楫回山中花落盡為報豫章臺

溪山漁艇圖

夕陽延暮景秋色遠冥冥流水雙溪綠寒山九疊青石
樓依古木草廵接遙汀釣叟長年在何人問客星

和楊伯謙韻

酌酒長松下垂蘿拂酒杯異禽窺藥鼎乳鹿臥書臺澗
水穿林去山雲帶雨回相期同結屋不厭野人來

贈傅元賓兼謝梁徵士

百里訪柴荆秋原獨自行屐沾山雨滑衣染澗雲輕賣

卜應潛姓工詩不趣名故人枉書札煩為謝高情

玉峽潭陂山莊

歲杪涉風烟連村熟芋田路危楓葉斷石險柱根縣鹿
柵成山壘漁梁阻澗泉爭心逐時化耕鑿喜安然

經湖口縣

古縣開湖口高檣集岼隈山從廬阜起江向武昌來近
水皆楊柳荒城半草萊客心原自速更遣曉風催

題方方壺画仁智圖為道士王默淵賦

玉簡神仙記瓊臺羽士家軒窗明日月冠佩剪雲霞白
鶴窺殘奕青童掃落花憶曾訪丹術楓逕駐輕車

周所立江村草堂

將軍舊日曾分祿為結茅堂草覆檐過橋柳暗鳥爭樹
當戶花開燕入簾醉書江石嫌雲冷晚飯山苗帶露甜
之子多才空白首獨將詞賦擬江淹

雲臥山房為了上人賦

空山雲臥杳難尋惟許人間禮磬音龍起鉢中生片影

鶴歸山頂結輕陰化為法雨沾衣濕散作天花遶座深
去住了然無定着祇應猛虎識禪心

仙溪書院為何能舉賦

江海歸來兩鬢霜仙源深處築茅堂參差樹映春山遠
窈窕橋通碧澗長金櫃藏書遺鳥跡石田栽玉起虹光
只愁來往迷花嶼預擬藤陰問釣航

山居圖

世傳隱處祇空聞草斷行踪路不分鬼谷樹深衣濕翠

鳳林芝煖石生雲寒泉疊響清琴調白雪飛花逐劍文
已約八公攜手去青岑從此謝羈氛

淵明入社圖

空山樓觀遠蒼蒼路出深深石磴長近瀑飛雲經樹濕
穿花流水過橋香高僧喜識枕榔杖稚子歡迎薜荔裳
入社幾時還入社松陰十里到柴桑

北澗春日 二首

青松遶舍間幽篁白板扉高薜荔牆窗曉禽聲答人語

山春蘭氣禱梅香家留渝曲幽居僻草滿臨城舊業荒
坐憶交親半淪沒不因鳴笛自沾裳

喔喔野雞鳴遠樹瑤琴揮罷思悵悵寒凌山色難生態
春入溪雲易合陰畬隴夜燒諳土俗州城晝掩識邊心
芳皋杜若相將綠偏覺騷人幽怨深

寄淦川友人

廢郭浮烟見綠蕪茅茨星散縣樓孤江連戈舫鳴春鸛
樹對寒燈起夜烏古硯自磨銅雀瓦坐氈還疊罽賓毬

市南美酒梨花白最憶青絲繫玉壺

送鎖子堅之袁城

雪色征袍拂曙颺宜陽西去思飄飄千峰靜對芙蓉幙
三峽遙連蟠螭橋擢得雀舟衝雨緩借來驄馬向春驕
青年書記相知久共按秦箏和玉簫

和楊允恭金明橋晚眺韻

楊炯多才愛碧流金明橋上對汀洲日沈水屋蒹葭晚
涼入山衣薜荔秋草色淺深行處合嵐光明滅望中浮

魚鳧零亂扁舟集渾似東湖釣石頭

題鄒惟中西樓

西樓遠對鼎山斜野客來尋駕鹿車竹嶼暝烟浮翠黛
石田秋雨潤銀沙清樽未酌心先醉往事重論鬢欲華
肯借溪南三畝宅從君學種邵平瓜

題宋能敏青壁軒

沓嶂層巒翠幾重神光動處有竒逢霧生深谷藏玄豹
泉落陰厓化玉龍丹篆曉書朱露濕碧窗晴對白雲封

何時攜我青藜杖結屋來依五粒松

舟行膠淺晚泊小橋期至豫章而別則咫尺矣即

事書懷簡何平子

偶遇乘槎侶因辭下澤車客程兼旦暮川路滯風沙石
碎愁鵝子汀長怯犬牙急湍騰雪馬淺溜蹙霜花聚舫
時連鷁攢篙若鬪蛇去留因地利漂泊任天涯洲指黃
牛近山瞻白鶴遐潭烟迷浦淑岬火識人家繫纜安椿
杙偎篷宿葦葭中宵漁響歇向曉雁聲譁忽憶別期促

還憐光景賒劍愁分紫氣酒喜酌彤霞坎壈身如寄蹉
跎鬢欲華相期何處好勾漏問丹砂

池閣獨坐懷周伯寧諸公

香閣林光合冰簾水霧銷虛池含碧鑑古甃疊青瑤境
託祇園迴泉分別圃遙雙桐陰覆地疏竹幹凌霄珍鳥
銜珠果金魚蔭翠苔輕颼吹白絮涼露濕紅綃鸚鵡懷
深酌瑩篴想緩調含情託柔翰幽賞憶清杓

綠錦池為定侯賦

官沼湛芳泉紅攏照綺錢藻絲翻玉鯉柳葉曳金蟬日
護瑰文麗雲迴碧甃圓凌波乘洛佩向月映湘弦樹影
浮觴近花陰列籍連鑑湖賓客在共賦綠荷篇

新歲有感寄東席煥章胡居敬

積雪蒼茫裏寒山慘淡中艱難經日別漂泊此時同筋
力年非壯詩書道未通狼烟春戍火禽語夜溪風心似
西橋水滔滔日向東

望香爐峰讀孟浩然詩因述

移櫂望廬阜香爐舊識名鳥飛千嶂碧日靜片雲青垂
瀑長虹下深溪猛虎行松門通佛宇蘿逕遶檐楹業愛
逖公白詩欣孟子清余方謝羈束幸此共芳聲

酬別宋贊善大夫景濂

諸老風流邈不聞誰攜健筆記清芬南宮新賜郎官佩
東觀長留太史文

聽琴圖為周易題

韋帶筠冠白氍衣龍唇鶴足軫文犀試看十指風前遶

曲裏時聞烏夜啼

題郭熙春山

紫霧春山綠樹齊
水流花嶼亂鶯啼
寒驢烏帽歸來晚
恰似成都濯錦溪

偶題 二首

烏絲細寫蠶頭篆
白紵新裁燕尾衫
雨過西軒苔色淨
澗中雲影似江帆

五粒松交九節蒲
銅餅分水浸珊瑚
小窗閒度遊仙曲


吹徧參差白玉筇

北澗夏日

酒傾蘭勺石泉香
衣剪荷盤露氣涼
誰料十年江海興
閉門疎雨對橫塘

夜宴定侯宅醉中口占

麾羽堂中畫燭明
將軍夜醉水西營
青樓小婦新承寵
彈得涼州第一聲



宋元詩會卷九十五

欽定四庫全書

集部
宋元詩會卷九十六

詳校官中書_臣陸 湘

主事銜_臣徐以坤覆勘

總校官知縣_臣繆 琪

校對官中書_臣嵇承志

謄錄監生_臣胡宗高

欽定四庫全書

宋元詩會卷九十六

兵部主事陳焯編

戴良

字叔能浦江人少學文於黃柳及余忠宣皆得其指授至正辛丑以薦授江淮等處行中書省儒學提舉遷亂避地吳中晚乃挈家泛海訪求豪傑欲有所為卒無所遇明初召至京師將官之以老病辭卒於寓舍

山有杞

山有杞于吳之里君子至止可以宴喜水有魚于吳之
墟君子止居可以宴胥於山於水有軒牕牕何斯違斯
莫或遑處于水于山有亭閒閒何斯違斯莫或遑安安
其可懷耄將至矣今也不樂歲月逝矣爰作斯圖式歌
且謠願言公退惟以逍遙其樂也哉

感懷

四首

杪歲屬搖落青蒲忽青青萌達未幾日大火已南明天
運一如是廢興安得停商郊遷夏鼎殷士裸周京冀方

既已沒毫社亦云平務光直達道敝屣薄時榮

玄圃有丹木八幹何亭亭光同白玉潤液比碧瑤清不
知何年代產此至陽精仙經所嘗言服之可千齡吾將
具舟楫涉海掇其英

良辰豈長遇陰晦在須臾今日弗為樂明旦恐不如都
門多佳麗清嘯當座隅促席道平素况有高士俱列俎
過三鼎傾酒盡百壺揮金娛心意慷慨不留儲達人每
滔蕩俗士恒自拘白頭懷軼軻撫已一長吁

家藏兩寶劍已合雌與雄
潛鋒在金匣謂當長相從
何言風雨夕化作雙蛟龍
一遊吳水西一落豐城東
相去邈千里時時氣上衝
神物終不隔歲晏會當逢

贈別汪定海

前舟已云發後舟更誰待
春事動江皋客愁滿山海
別晷只須臾會期知何在
亦既違素心安得顏不改

和淵明連雨獨飲

陶翁固貧士異患猶不干
公田足種秫亦且居一官
我

無半畝宅三旬纔九餐況多身外憂有甚饑與寒委懷
窮櫪下何以開此顏清風颯然至高歌吾掩關

寄宋潛溪

孤鴻失儔侶連翩洲渚湄自知羽翮短不與同奮飛寄
聲奮飛者當慎子所之烟波渺無從雲路迴難依雲路
多鷹隼烟波有虞機

田居

我生非匏瓜於世可無食躬耕實所慕戮力歸稼穡當

春土脉動農事滿阡陌晨興負耒去日入弗遑息我苗
今已長我耕有餘隙斗酒勞近隣隻雞餉過客人生但
如是亦足慰平昔此意誰復知千載惟沮溺

節婦操為賈妻作

父母嫁妾時遺妾雙鴛綺雙鴛既同生亦復與同死當
知妾有夫結言亦如此妾夫今在遠妾身今獨止恐為
行露侵莫與雙鴛齒飲恨赴長川川竭恨乃已

立秋日言懷

六龍不可頓四序忽復移氣變感人心愴然已秋時池
荷挺素質園葵吐芳蕤豈無一日好不久還當衰覽物
惜年邁撫景傷志違日暮坐空堂此懷當告誰

中秋無酒

彼節忽已易吾年信難留含情及玄夜逝將秉燭遊皎
皎明月光照我城南樓常時猶足賞矧乃當素秋東鄰
有美酒飲之祛百憂客途無由得虛使時運流未知明
年月還如此夜不既虛行樂志空歎將誰尤

別宋潛溪

昨宵郡齋宿今旦赴行舟官程不敢違可使須臾留掩
泣別故交強顏逐前儔未嘗去鄉邑詎能千里遊金陵
古帝鄉雄跨東南州至今列甲第奕奕居公侯冠蓋若
雲擁車馬如川流厚祿不虛授高才將見收如何獨多
念去去懷百憂

送劉彥英東還

轉蓬無定在飄颻將何之未遽離本根賴有回飈吹在

昔從一官整駕來南陸何意十載留竟負三年期上有
垂白親下有初長兒平生已艱瘁況復當亂離及茲神
武師拓地如拾遺遂令客行士秋晏薄言歸慈母既生
還弱子亦抱持歌舞入故都志願幸無違鴻鵠遊四海
鷦鷯守一枝寧守卑棲分不隨鴻鵠飛

詠懷

少小秉微尚游心在六經苒苒歲年遲乃與塵事冥入
秋多佳日何以陶我情園蔬青可摘新穀亦既升命室

釀美酒一壺聊復傾兒女在我側親戚還合并終觴無
雜言但說歲功成至樂固如此是外徒營營

和沈休文雙溪八詠 二首

秋至愍衰草衰草遍平陸方晨露染黃入夜風銷綠別
葉有歸聲故蕊無留馥勁莖忽自摧寒叢竦如束彼物
既如斯我年寧不促已失早生榮敢冀晚凋福何當即
去茲縱浪從所欲

晨征聽曉鴻鴻飛何處所隨陽弱水岸違寒長沙渚冥

冥憶霜羣邕邕叫雲侶固將聯匹儔豈惟念羈旅視夜
已昭晷度聲尚悽楚以之頻感觸將何慰艱阻帛書望
不來誰知我心苦

還舊居

自我遠行遊故廬今始歸如何廿載間舊事都已非曳
杖過比鄰相呼尋故知不見垂白翁但見初長兒我園
既稍葺我田亦就治種秫釀美酒拾薪煮豆糜一笑集
親朋相從說睽離以之感疇昔俛仰多所悲人生一世

中所憂渴與饑力耕給其用此外更何思便當息吾駕
皓首以為期

答李寧之

涸鱗思赴海倦翮念歸山如何遠遊客歲久不知還世
塗方擾擾豺虎尚為患久嫌軍務勞翻羨為客閒夜雨
滴愁夢晨風颯頽年丈夫雖耿介亦或多苦顏而我承
結鄰獨喜相追攀未堅金石交已枉瑤華篇時時感嘉
貺相視兩悽酸豈不欲為答情深諒難宣

寄王子充

燕燕何從來其羽已差池飛入華堂內意在巢君帷君
帷豈不好傷哉非故知引去方未能欲留復迴疑噉噉
徒曉風翩翩空暮闌

城東會飲送王天錫

陰崖斂暝霏霜陸耀晴晈蕭蕭落木多綿綿衰草遍開
冬感徂物列飲會羣彥美醑溢流霞妍談粲餘絢時髦
非我匹清尊豈余戀行矣送將歸悵焉罷歡宴引領阻

雲從搔首歎蓬轉

贈別祝彥明

悵望臨荒蹊驅馳騁遐步江紆練月初山標綵霞暮天
長路易迷水深舟難渡征人去不息倦僕立相顧此時
悲送君安能髮不素

徐叔度遺紈扇

團團七華扇名在制久缺感君裂紈素與蒙卻煩暍入
手訝如珪映容疑學月玩之炎氣消握之微風發卻願

暑長在無使情暫歇

治圃二首

三春豐雨澤晨興觀我畦嘉蔬有餘滋草盛相與齊
戮力治亂穢指景光已西好月因時來歸路杳然迷暮鳥
尋舊林晚獸遵故蹊我亦息微勞去去安吾棲

長夏罕人事齋居有餘閒北窗多悴物且遂灌吾園攢
根既舒達積葉亦蔥芊瓜瓞繞畦長新葵應節鮮抱甕
一回視生意盈化先在我豈不勞即境多所歡悠悠千

載間樊生信為賢

次場口

久宦迷故都故都在何處驅車向鄰壤白頭不知路長
林日夕行曠野東西顧方遠歎途阻逾近覆心懼豈無
入林翮莫與歸颺遇

望九靈山

九靈邈何許連峰高不極依稀接遠霧仿像起寒色我
家是山下別來歲頻易屋廬閒鳥聲冢墓遺獸跡可望

不可至空多故鄉憶

泛海

仲夏發會稽乍秋別勾章擬杭黑水海首渡青龍洋南
條山已斷北界水何長遠近浪為國周圍天作疆川后
偶安恬天吳亦屏藏蕩槳乘月疾挂席逐風揚零露拂
蟠木旭日耀扶桑我行無休隙此去何渺茫東海蹈仲
連西溟遁伯陽輕名冀道勝重已企時康孰謂情可陳
旅念坐自傷

望大牢山

稍入東膠界即見大牢山峰攢倅劒戟嶂疊類雲烟稜
稜挿巨海渺渺漾中川波濤共突兀天日相澄鮮氓居
接島嶼觀宇連術阡既館茹芝士亦巢遁世賢客行積
昏旦水宿倦舟船茲山思獨往結茅徵願言柁師不我
從太息歸中原

抵膠州

舟行無休期晨夜涉風水蹈越歷吳鄉乘楚造齊鄙逼

浦波尚險即陸路纔砥依倚見州郭倉皇問官邸土牆
訝已頽草屋驚全圯所幸民俗淳稍使客情喜北來既
旬月西去尚幾里嚴程謂已近危途方始此沮洳浩茫
茫菅茅復靡靡幽燕去斷魂伊洛望心死日暮坐空牀
浩然念粉梓

永樂寺觀先師柳公三大篆及諸石刻泫然賦此
舍舟遵微行振衣遊淨域誰知登眺初已動存沒憶大
篆揭巍堂古句刻貞石詞翰固留今身世悉成昔筠綠

雨新霽山寒窗易夕方懷露電悲何有林泉適

龜毛廬

倦游去朝市委懷在田園既悟執戟疲益知荷蓀賢夙
晨飯牛出夕曛負耒還春作固云力秋斂未盈廛求贏
豈其願拙業乃所安不見龜上毛成羶亦良難

和陶雜詩 三首

大鈞播萬類飄忽如風塵為物在世中倏焉成我身弟
兄與妻子於前定何親生同屋室處死與丘山鄰彼蒼

無私力宵盡已復晨獨有路旁堠長閱往來人

義馭不肯遲榮悴詎可量舉頭望穹昊日月已宿房隕
霜凋衆類慘慘未渠央李梅忽冬實又復值愆陽物化
苟如此祇亂我中腸

朝耕谷口田暮採陌上桑歲晚望有收嗟哉成粃糠白
頭去逐食所謀惟稻粱嗷嗷天海際何異雁隨陽昨宵
得奇夢可喜復可傷為言東海上卻粒有其方早晚西
王母酌以瑤池觴

和陶擬古 三首

白日忽已晚流光薄西隅老人閉關坐慘慘意不舒日

月我戶牖天地吾室廬自非奪元化此中寧久居今夕

復何夕涼月滿平蕪悠悠望去途歎息將焉如陶詩何如之如

訓作似焉如之如訓作往今人用焉如代何如者皆謬也

我昔年少時高視隘八荒惟思涉險道誰能戒垂堂南
轅與北軌所歷何杳茫一旦十年後盡化爭戰場豈無
英雄士幾人歸北邙撫此重長歎壯志失軒昂斂退就

衡宇蹙蹙守一方往事且棄置身在亦奚傷

勸君勿沈憂沈憂損天和尊中有美酒胡不飲且歌我
觀此身世變幻一何多無相亦無壞信若空中花戚戚
以終老君今其奈何

和陶飲酒

六首

今晨風日美吾行欲何之平生慕陶公得似斜川時此
身已如寄無為待來茲况多載酒人任意復奚疑山顛
與水裔一觴歡共持

昔出非好榮今處非避喧中行有前訓恐遂墮一偏商
於四老人遺之在西山朝歌紫芝去暮逐白雲還當其
扶漢儲亦復吐一言

三春布陽德萬物發華滋凌霄直微類近亦附喬枝低
迷衆無覩高出乃見竒煌煌九霄中榮夸遽爾為我道
似不爾一笑縣吾羈

我如北塞駒因此東南道有力不獲騁長鳴至于老冉
冉陰陽移萬物遞榮槁既無騰化術此身豈長好一朝

委運往恐遂失吾寶何當攜麴君縱浪遊八表

靡靡歲云暮此已非吾時浮居執蕩志逝將與世辭破
屋交悲風得處正在茲握粟者誰子無煩決所疑道喪
士失已節義久吾欺於心苟不愧窮達一任之

我老愛窮居蓬蒿荒繞宅與世罕所同車馬絕來迹寓
形天壤內幾人年滿百顧獨守區區保此堅與白若復
不酣飲此生端足惜

題吳上人游息軒

名山鬱岌飛軒起弘敞覺花墮檻明忍草緣堦長日
落萬壑冷風振百泉響掃庭驅虎出倚欄延月上雲影
共棲息山光同偃仰晚磬度筠清夕牕含澗爽良遊雖
暫適多累詎長往所以俗中人昏昏在天壤

艾如張

翠為衿錦為衣朝朝暮暮澤水飛澤中青草深且茂莫
聽爾媒登壘雖壘頭西接桃李塲蓬蒿艾盡有羅張羅
雖可避機莫測爾誤觸之恐身傷請看舊日張羅處祥

鳳冥鴻不肯顧

朱鷺

朱鷺何從止去啄金堤飲玉水朝隨赤雁暮碧鷄蕩漾
驚波不得棲有時挾子上林去網絲紛紛復難避不如
斂翅江海湄遠卻幽并游俠兒

白頭吟

莫把白頭吟來調綠綺琴蜀客當年聘私室兩情總向
琴中得誰信黃金買賦時已是青蛾辭寵日免絲春來

託女蘿雪霜未至尚纏柯若箇人心如草木不到白頭
妾遭逐妾有嫁時綠玉簪時時挿髻悅君心一朝墜地
雙股折恰似君心中道絕我簪縱折猶共藏君心一絕
去他鄉

白紵歌

闔廬宮中夜撾鼓宮樹烏啼月未午玉缸提來酒如乳
白紵衣成向君舞美人醉起行步難腰間珂珮聲珊珊
肯緣嬌愛減君歡寶釵墮地不敢言宮中門戶多無數

君恩反覆日幾度明朝重著舞時衣心中已道不相宜
短歌行

青天上有無根日馳光暫明還復黑晝夜相催老卻人
忽忽吾年四十七偶看舊鏡鏡為羞昔髫未生今白頭
朱顏丹藥已難覓青史功名行且休富貴不來老還至
病妻對之怨且詈妻年比我雖稍卑近亦催顏如我衰
一生仳離殆居半此世歡娛能幾時

湖州行送人作郡

湖州歲歲修城堡敵騎時燒城外草城外居民如野鹿
目睽睽兮尾促促去輸官稅輸不足半在軍中半在獄
獨留新婦餉姑前也執吳綃供稅錢吳綃已盡歸未得
復到官家候消息我相聞之憂爾湖命選賢侯此剖符
賢侯若為湖作主便須罷却徵求苦留得湖民障茲土

題顧氏長江圖

天下幾人画山水虎頭子孫世莫比何年寫此長江圖
多少江山歸筆底巴陵三峽天所開遠勢似向岷峨來

洞庭瀟灑僅毫末楚客湘君安在哉江上一朝風雨急
老我曾來踏舟立鼓枻既聞潭畔吟抱琴復聽竹間泣
別來幾日世已非忽此披圖憶曩時早知避地多處所
肯逐紅塵千里歸

訪止公於文溪

杖錫遊茲地過從動隔年已無離別想那有去來緣心
事青山外禪機白石前偶來非道意敢借慧燈然

投王郡守

已落時人後誰能說姓名惟應馬南郡偏重鄭康成賓
館縣牀待公庭罷吏迎為居門下久童僕亦多情

投同僉公

投鉞幾專征分藩復此行身為漢飛將家若魯諸生秘
畧三邊服妖氛一劒橫已多門下客持筆待功成

送歸安丞

之子官何處湖流一舸通汀洲蘋影濶城郭水光中夜
泛苔溪月春吟若下風若逢陳太守為報各衰翁

自定州入海

乍離東海郡又上北溟船紅見波中日青窺水際天鄉
關千里隔身世一帆縣鄉信何從達歸鴻落照前

至膠州

自入東膠路鄉邦此地賒人悲西候日帆亂北溟霞民
俗農為業州城土作家驛樓何處是庭樹暮棲鴉

宿高密

客路信悠悠荒城許暫投黃塵齊地晚紅葉海邦秋燈

影明官驛鐘聲度縣樓去家今幾許猶自夢東州

寓昌樂

淮海來時路東西幾日程一年行萬里數口託孤城邯
水方馳箭峻函未罷兵餘年已無幾坐此欲何成

次益都

使傳來遙甸估車馳近垌茅廬城外市楊樹驛邊亭溜
水穿原綠牛山入郡青西遊應未遂又復渡滄溟

經金繩廢寺

寂寞唐朝寺頻年客到稀
空山孤殿在荒逕一僧歸
苔色驕秋雨松聲振夕暉
驚鳥初有託近亦出林飛

歲暮

移家東海上汨沒度危時
草市腥江鮑民居雜島夷衣
冠隨俗變姓字畏人知
保已無深計翻言命可疑

辛亥除夕

湖海風雲暗道途霜雪清
如何一年盡翻使百愁生
俗薄乖留計時危緩去程
家人團坐夜應悉旅中情

渡海

結屋雲林度半生老來翻向海中行
驚看水色連天色厭聽風聲雜浪聲
舟子夜喧疑島近估人曉卜驗潮平
時危歸國渾無路敢憚波濤萬里程

黑水洋

涉海纔經五日期深洋一望黑
淋漓波搖月夜人先見船過雨天龍
未知險勝呂梁漂鷁處悲同巫峽泣
猿時平生自有乘桴志莫為微軀到此疑

寄鶴年

衡門之下可棲遲且抱遺經住海涯東漢已編高士傳
西方仍誦美人詩衰年避地方蓬轉故國傷心忽黍離
天末秋風正蕭瑟一鴻聲徹暮雲悲

有懷淬用剛賦此以寄

何處名山擅地靈雨微峰下樹青青九天石落疑星化
一夜龍歸挾霧腥禪窟已鐫新賜翰法函惟啟舊藏經
道人猶恨居山淺杖錫時時入杳冥

承君衡叔幹遠送賦此以別

長風吹度海東邊
慣聽潮聲已十年
往事免成塵撲面
新愁惟有雪盈顛
半生望眼迷遼鶴
一夜歸心到蜀鵑
迷賦驪駒慚二妙
縱歌安得酒如川

寄俞伯熊兼東李仲彬

東郭先生最老成
天才久已負時名
能詩不減唐工部
解飲渾如晉步兵
塞上征鴻高避弋
海東歸鶴暗聞聲
比鄰喜有知心客
一夜彈碁直到明

懷滑櫻寧

海日蒼涼兩鬢絲
異鄉飄泊已多時
欲為散木居官道
故託長桑說上池
蜀客著書人豈識
韓公賣藥世偏知
道途同是傷心者
只合相從賦黍離

咏懷古迹

客來慎勿說姑蘇
弔古令人百感俱
已訝當年嘗越膽
更堪此日聽吳趨
荒臺鹿下江聲咽
古木烏啼月影孤
欲問闔閭埋葬地
五湖東畔已荒蕪

憶汪遜齋

四明羈客近如何別去今纔一月過記得小齋多野思
豆花陰裏唱離歌

周伯琦

字伯溫饒州人父應極事武宗仁宗為翰林待制
伯琦自幼從官京師入國學為上舍生以蔭授南
海縣主簿三轉為翰林修撰至正元年改奎章閣
為宣文閣藝文監為崇文監伯琦官授經郎於宣
文閣帝愛其工書法眷遇日隆常呼伯溫而不名
命僉廉訪司事於廣東復召入翰林以待制陞直
學士十二年命南士皆得居省臺伯琦與貢師泰
同擢監察御史會御史大夫額呼特穆爾將大軍

南討失律喪師臺臣劉布曾等具疏糾之伯琦反
劾布曾等越分干譽遂由是不為公論所與屢除
江夏浙西肅政廉訪江南行臺監察御史多被人
言十七年以參知政事招諭張士誠於平江士誠
既降伯琦前誣漸白因留平江十餘年士
誠滅伯琦始歸鄆陽尋卒有詩文稿行世

入居庸關

出關復入關五見月上弦草木雖未霜寒風已淒然屋
路何紆縈疊嶂橫中天上有太古石下有無底泉幽致
良足嘉萬雷奈喧聞馴象寶轡鳴紫駝錦幪鮮鐵騎簇
雲隊黃屋循星纏時巡謚風俗執法恭後先達官國同

休拔宅如登仙細民終歲勞輸轉百舌剪苦樂殊雲泥
使我中心惛偶經巖谷勝復憶江湖壩升高望白雲楚
天浩無邊王師未休息敢賦歸來篇

題南陽諸葛廟

劍江流水綠沄沄五丈原頭日又曛舊業未能歸後主
大星先已落前軍南陽祠廟荒秋草西蜀關山隔暮雲
正統不慚傳萬古莫將成敗論三分

答復見心長老見寄

二首

浙水東頭佛舍連蒲菴上士坐忘年五雲古衲層瀾湧
百寶浮圖列宿躔牀上貝書多譯梵門前海舶直通燕
比丘喜得階蘭秀應種菩提滿法田

九載違離得遠書窗更歲厯斗旋樞華星秋月超元白
峻嶺重江限越吳柏子樹陰浮碧砌蓮花漏水響銅壺
老夫素有林泉癖一曲何當乞鑑湖

郊韶

字九成吳興人

哀楊節婦吳氏

丞相師昏長夜酒司徒援絕憑城守七萬兵分諸將屯
坐視霜風折蓉柳冰肌月貌忍泥滓錦棚觸佩同歸水
九泉無愧先人面終身不作他鄉鬼君不見凋戈白馬
氣如雲昨日烈丈夫今日降將軍於乎楊婦吳氏何可
羣

次韻玉山晚泊

長林夕露下一雁過秋天月照風燈外星沈夜水前美
人隔烟渚清夢落江船孤坐聞城漏迢迢夜不眠

題漁家壁

漫郎家在黃泗浦閒看飛花坐北窗渡口青山高似屋
門前湖水直通江垂楊繫艇已千尺春鯉上盤纔一雙
野老相過無一事白頭喜對酒盈缸

和報復元秋興

大星出海芒角稀新月隔林光景微空山無眠雞犬靜
獨樹忽驚烏鵲飛已喜中朝下優詔側聞南國尚戎衣
釣竿早晚落吾手日日放船來水扉

用楊鐵厓書畫船亭韻與玉山同賦 二首

越來溪上暮潮過，飲馬橋頭春水波。
出郭喜知塵事少，吹簫無奈月明多。
花飛斷岸衝歸燕，柳蔭長溝汎白鵝。
擬送一甌臨水榭，扣絃同奏竹枝歌。

卜築喜過揚子宅，城居曲曲抱溪流。
夕陽在波人影亂，秋水上簾竹色幽。
載酒到門從問字，據牀吹簫不驚鷗。
月明後夜稽山雪，乘興還能具小舟。

寄范叔豹

江路霜寒木葉凋，憶君何處思迢迢。
長年旅食同秋雁，故里風烟隔暮潮。
甚欲寄書酬遠別，絕憐把燭待清宵。
雙溪月色涼如水，誰採瓊芳慰寂寥。

次韻楊子壽同浦太守遊顧園

辟疆園裏好花開，路隔仙源一水隈。
春暖鳬鷺當檻浴，草青蝴蝶上衣來。
柘枝屢舞團團扇，竹葉深傾灑灑杯。
何事綠波生浩蕩，画橋風急彩舟迴。

奉寄玉山

仙人愛向桃源住曲曲雲林勝輞川秋水到門船似屋
青山當檻樹如烟常時待月溪邊立最愛梳頭竹裏眠
我有好懷清夢遠題詩還到草堂前

虞山道中有懷仲瑛

言偃宅前湖水東千門楊柳綠搖風一蓬山色斜陽外
半夜雨聲春夢中獨客年年如旅雁行人草草似驚鴻
芳洲杜若憑誰采心逐寒潮處處同

吳中覽古

赤欄橋下記停橈
細雨菰蒲響暮潮
說與行人莫回首
故宮烟柳正蕭蕭

過漁浦

江水飛花作雪輕
月明似入剡溪行
可堪一夜天涯雨
臥聽春潮送櫓聲

曉發商溪戲東金粟道人

商水西頭花滿烟
画船銀燭理絲絃
翠屏何處驚殘夢
臥看青天春月圓

題魏明鉉

老翁住在浣花村
日日哦詩醉瓦盆
怪底橫江見船尾
不知春水到柴門

和西湖竹枝詞

二首

十五女兒羅髻垂
照水學畫雙蛾眉
長橋橋下彎彎月
偏向儂家照別離

妾家西湖住橫塘
門前楊柳萬條長
願郎醉後休輕折
留待重來繫馬韁

周砥

字履道

吳人

擬古 二首

迢迢遠別離相去幾萬里月照衡陽關風吹漢江水宵
夢不可託路迷復中止登山還有屐涉水亦有舟我心
如縣旌搖搖獨無休常恐瑤華落春風不能留豈君弗
識察故此長悠悠安得似鸚鵡銜書東海頭

翡翠栖蘭苔鴛鴦上錦機物固各有類寸心獨何依春

色來幾日海燕忽雙飛迎風不須入塵滿青樓扉

對新柳

纔弄新春色已有縈愁意欲倚不成眠待扶還似醉疎
雨飄枝濕暮雀銜花墜脉脉獨含情故園那得至

夜坐懷孝常

待月下石壁罷琴竹間亭坐絕百蟲響旅懷纔夜寧天
高玉露瀉草木流晶熒四山湛秋色萬物無隱形風蟬
抱葉落雪鵲迎雲停此時西澗人柴門久已扃誰同展

清會念此風泠泠世難避空谷憂思同醉醒偶適不為
貴人生易漂零茫茫河漢流熒惑光衆星干戈未衰息
前途杳冥冥歲晏有結託東去浮滄溟

讀書

讀書易為感時節已徂秋行遊固可適歲月懼不留高
齋曠而寂人務罕相酬千載事了了寧不慕前修道在
無今古天運每周流萬理由我具消搖極冥搜為樂不
在茲況復儲怨尤予本楚狂士意氣邁九州偶然似有

契持身寓林丘萬鍾非所辭一毫非所求

晚晴送禪師

浮雲暮褰霽空宇湛然清復念還山客遲遲南澗行新
禽響叢木殘照入孤城即此閒來往方紆塵外情

元日試墨

金鴨香猶吐風簾影自飄輕冰生墨沼餘雪綴寒條茅
屋行當買山雲坐可招且無軒冕意隨分樂漁樵

五月廿日雨中飲南樓

何許開尊散旅愁
疎簾冰簟水南樓
天邊遠岫一黃鵠
雨裏垂楊雙白鷗
閒對故人思故國
不堪歸夢阻歸舟
東行未見烟塵靜
腸斷高堂鶴髮秋

雨後

竹堂東偏芝草亭
澗水繞榻風泠泠
碧梧鶯語嬌似醉
玉鉞荷花愁欲醒
可憐光景易流轉
無奈踪跡尚漂零
瑤琴一彈為君掩
日暮高山雲杳冥

夏日同強二秀才過鑑公山房遊仁壽精舍

尋僧直到梵王家便汲山泉為煮茶阮藉從來無禮法
湯休何用着袈裟醉眠石閣聽風樹步入松雲掃砌花
與子歸時仍並轡蕭條墓道夕陽斜

寄楊文可

屋廬星散當山郭門前小溪相與通橘子壓樹千頭綠
鯉魚跳波雙尾紅空梁寒月拱夜鼠傍壁燈火鳴秋蟲
故人亦在他鄉住此時作客情思同

因泉公歸簡王二秀才

千巖春靜一僧歸相送空林夕景微茶具等閒拋石閣
釣竿行已臥苔磯草生南浦牽詩夢漚下輕波識道機
若見王喬因借問雙鳧何日向南飛

漁莊

秋月團團照藥闌水邊簾幕晚多寒素娥不上青鸞去
借得銀箏花裏彈

鄭元祐

字明德遂昌人元
末來住玉山甚數

送友還鄉

墮地作男兒有用須及早當年縣弧意焉得鄉曲老青
雲一蹉跎鬢髮日已皓常恐歸去遲心焉慙如搗我家
東吳城翠竹森若葆力耕輸王稅妻子亦溫飽詩成每
獨詠觴至或共倒富貴將焉如歲晏聊自保蕭蕭風前
柳絮賀賀霜下草有官固當歸無官歸亦好

出塞

已踰烏盤山未涉白狼水饑羸形骸黑枕戈待明起將

軍方踟躕天地入馬筆吾儕亦何人一死等螻蟻

姑蘇臺

城西高臺高百尺傳是吳王舊遊迹百花正開西子醉
明月芳洲照清夕嬌顏如花醉王側城上烏啼曉星白
歌鼓聲消醉未消越王已將兵來朝鏹金撾鼓殷天地
兵敗可復棲夫椒吳人遺恨化潮汐暮往朝來箭涇直
不然亦可君甬東何用蕭蕭馬嘶驛

東坡赤壁圖

奎星墮地不化石化作盤天老胸臆清禁森嚴著不得
半夜吹簫過赤壁百萬蛟龍不敢聽萬古東流月華白

春日湖上有感

潮落空城誰重過猶餘里耳聽鳴珂襄陽耆舊知誰在
江左風流不厭多自見石麟眠枳棘長聞蜀魄叫松蘿
野梅開盡西湖雪萬斛春愁奈爾何

元宵懷錢塘

武帝親迎太乙神流光絢煜動星辰行宮典禮猶存漢

軹道山河已易秦香逕至今啼木客露盤無淚泣金人
紅燈幾點東風裏猶是元宵一度春

楊鐵崖新亭

草玄心苦思如何艤舸舟輕不動波聽雨夜蓬燒燭短
截雲湘竹弄愁多賦成猶夢橫江鶴書罷應籠汎渚鵝
想見後堂涼月白彭宣腸斷雪兒歌

贈張景亮仕回

投老何曾畏簡書青山原不負吾廬魚須久疊牀頭笏

馬軌新縣屋角車翠被春寒聽雨睡白頭日午起風梳
好官付與諸郎做千古封留意有餘

次韻劉憲副春日湖望

湖水荒荒寒食天相逢猶話國初年江樓夜唱花間集
翠管春吹月下船玄圃自應留富麗湘雲誰為惜清妍
可憐頭白歸來日井邑淒涼生野烟

陶靖節像

袖裏慚無博浪槌酒醒空賦稚桑詩悲涼一曲山陽笛

滿眼山河是義熙

宋元詩會卷九十六